

晉史乘題辭

晉史乘於劉向校讎未之聞余近年與楚史檮杌併  
得之誠奇書也不著作者各氏觀其篇目次第與晏  
子春秋相似疑出於一時雖桓文之事仲尼之徒不  
道而晉乘楚檮杌孔子修春秋多取之余嘉其書因  
錄之以備三史之目

大元大德十年冬至日武林吾衍識



晉史乘目錄

野人與塊第一

釐負羈第二

里鳧須第三

盟河第四

反國行賞第五

介子推第六

大蛇阻道第七

勤王第八

襄王賜命第九

國家圖書館, NATIONAL CENTRAL LIBRARY, TAIWAN, R.O.C.



請隧第十

出陽民第十一

斬顛頡第十二

伐原第十三

舉原令第十四

伐衛第十五

取五鹿第十六

虢亾第十七

分曹地第十八

伐鄭第十九

伐宋第二十

伐鄆第二十一

伐楚先轅第二十二

伐楚第二十三

結履第二十四

燒楚軍第二十五

用民第二十六

會盟第二十七

救饑第二十八

宰人上炙第二十九

逐獸第三十

失廩第三十一

西河守第三十二

登隧第三十三

國難第三十四

種米第三十五

封狐文豹第三十六

問政第三十七

原李第三十八

李離第三十九

傅謹第四十

益白季宅第四十一

日食第四十二







晉史乘

明新安吳瑄校

野人與塊第一

文公出亾過五鹿乞食於野人野人舉塊以與之公怒將鞭之舅犯曰天賜也民以土服又何求焉天事必象十有二年必獲此土二三子志之歲在壽星必獲諸侯天之道也由是始知有此其以戊申乎所以申土也再拜稽首受而載之

釐負羈第二

文公出亾過曹共公聞其駢脅一袒而浴設薄以觀



之釐負羈之妻謂釐負羈曰君無禮于公子吾觀其從者皆賢人也若以相夫子反晉國必伐曹子何不先加德焉釐負羈遺之壺餐而加璧焉文公受其餐而反其璧及其反國起師伐曹克之令三軍毋入釐負羈之里

### 里鳧須第三

文公出亾過曹里鳧須從因盜文公資而亾文公無糧餒不能行介子推割股肉以食文公然後能行及文公反國國中多不附文公者於是里鳧須造見曰臣能安晉國文公使人應之曰子尚何面目來見寡

人欲安晉也里鳧須曰君沐邪使者曰否里鳧須曰臣聞沐者其心倒心倒者其言悖今君不沐何言之悖也使以聞文公見之里鳧須仰首曰離國久臣民多過君君反國而民皆自危里鳧須又襲竭君之資避于深山而君以餒介子推割股天下莫不聞臣之爲賊亦大矣罪至十族未足塞責然君誠赦之罪與驂乘遊于國中百姓見之必知君不念舊惡人自安矣於是文公大悅從其計使驂乘於國中百姓見之皆曰夫里鳧須且不誅而驂乘吾何懼也是以晉國大寧

涉中人語而  
封雍處  
其祖此身



盟河第四

文公入國至於河令棄邊豆茵席顏色黎黑手足胼  
胝者在後舅犯聞之中夜而哭文公曰吾亾也十有  
三年矣今將反國夫子不喜而哭何也其不欲吾反  
國乎對曰邊豆茵席所以官者也而棄之顏色黎黑  
手足胼胝所以執勞苦而皆後之臣聞國君蔽士無  
所取忠臣大夫蔽遊無所取忠友今至於國臣在所  
蔽之中矣不勝其哀故哭也文公曰禍福利害不與  
舅氏同之者有如白水祝之乃沈璧而盟

反國行賞第五

文公亾時陶叔狐從及反國行三賞而不及陶叔狐  
陶叔狐見舅犯曰吾從君而亾十有二年顏色黎黑  
手足胼胝今君反國行三賞而不及我也意者君忘  
我與我有大故與子試爲我言之君舅犯言之文公  
文公曰噫我豈忘是子哉夫高明至賢德行全誠耽  
我以道說我以仁暴浣我行昭明我名使我爲成人  
者吾以爲上賞防我以禮諫我以誼蕃援我使我不  
得爲非數引我而請於賢人之門吾以爲次賞夫勇  
壯強禦難在前則居前難在後則居後免我於患難  
之中者吾又以爲之次且子獨不聞乎亾人者不如



存人之身亾人者不如存人之國三行賞之後而勞苦之士次之夫勞苦之士是子固爲首矣豈敢忘子哉周內史叔輿聞之曰文公其霸乎昔聖王先德而後力文公其當之矣

### 介子推第六

文公反國酌士大夫酒召舅犯而將之召艾陵而相之授田百萬介子推奉觴而起曰有龍矯矯將失其所有蛇從之周流天下龍旣入深淵得其安所蛇脂盡乾獨不得甘雨此何謂也文公曰嘻是寡人之過也吾爲子爵與待旦之朝也吾爲子田與河東陽之間介子推曰推聞君子之道謁而得位道士不居也爭而得財廉士不受也文公曰使我得反國者子也吾將以成子之名介子推曰推聞君子之道爲人子而不能承其父者則不敢當其後爲人臣而不見察於其君者則不敢立於其朝然推亦無索於天下矣遂去而之介山之上文公使人求之不得爲之避寢三月號呼暮年詩曰逝將去汝適彼樂郊適彼樂郊誰之永號此之謂也文公待之不肯出求之不能得以謂焚其山宜出及焚其山遂不出而焚歾

### 大蛇阻道第七



文公出獵前驅曰前有大蛇高如堤阻道竟之文公曰寡人聞之諸侯夢惡則修德大夫夢惡則修官士夢惡則修身如是而禍不至矣今寡人有過天以戒寡人還車而反前驅曰臣聞之喜者無賞怒者無刑今禍福已在前矣不可變何不遂驅之文公曰不然夫神不勝道而妖亦不勝德禍福未發猶可化也還車反宿齋三日請于廟曰孤少犧不肥幣不厚罪一也孤好弋獵無度數罪二也孤多賦斂重刑罰罪三也請自今以來者關市無征澤梁無賦斂赦罪人舊田半稅新田不稅行此令未半旬守蛇吏夢天帝殺蛇曰何故當聖之道爲而罪當死發夢視蛇臭腐矣謁之文公曰然夫神果不勝道而妖亦不勝德奈何其無究理而任天也應之以德而已

### 勤王第八

文公時周襄王有弟太叔之難出亾居於鄭不得入使告難于魯于晉于秦其明年春秦伯師於河上將納王狐偃言於文公曰求諸侯莫如勤王且大義也諸侯信之繼文之業而信宣於諸侯今爲可矣卜偃卜之曰吉遇黃帝戰於阪泉之兆公曰吾不堪也對曰周禮未改今之王古之帝也公曰筮之筮之遇大



有之睽曰吉遇公用享于天子之卦戰克而王享吉孰大焉且是卦也天爲澤以當日天子降心以迎公不亦可乎大有去睽而復亦其所也文公辭秦師而下三月甲辰次于陽樊右師圍溫左師逆王夏四月丁巳王入于王城取太叔于溫而殺之于隰城戊午文公朝王王享醴命之侑予之陽樊溫原攢茅之田晉於是始開南陽之地

### 襄王賜命第九

襄王享醴命文公侑王命尹氏及王子虎內史叔與父策命文公爲方伯賜之大輅之服戎輅之服彤弓一彤矢百茲弓矢千秬鬯一卣虎賁三百人曰王謂叔父敬服王命以綏四國糾逖王慝文公三辭從命曰重耳敢再拜稽首奉揚天子之不顯休命受策以出出入三覲

### 請隧第十

文公既定襄王于郊王勞之以地辭請隧焉王弗許曰昔我先王之有天下也規方千里以爲甸服以供上帝山川百神之祀以備百姓兆民之用以待不庭不虞之患其餘以均分公侯伯子男使各有寧宇以順及天地無逢其災害先王豈有賴焉內官不過九



御外官不過九品足以供給神祇而已豈敢厭縱其耳目心腹以亂百度亦唯是死生之服物采章以臨長百姓而輕重布之王何異之有今天降禍災于周室余一人僅亦守府又不佞以勤對父而班先王之

大物以賞私德其叔父實應且憎以非余一人余一人豈敢有愛也先民有言曰改玉改行叔父若能光裕大德更姓改物以創制天下自顯庸也而縮取備物以鎮撫百姓余一人其流辟于裔土何辭之與有若由是姬姓也尚將列爲公侯以復先王之職大物其未可改也叔父其懋昭明德物將自至余敢以私勞變前之大章以忝天下其若先王與百姓何何政令之爲也若不然叔父有地而隧焉余安能知之人公遂不敢請受地而還

出陽民第十一

周襄王以陽樊賜晉文公陽人不服晉侯圍之倉葛呼曰王以晉君爲德故勞之以陽樊陽樊懷我王德是以未從于晉謂君其何德之布以懷柔之使無有遠志今將大泯其宗祊而殘殺其民人宜吾不敢服也夫三軍之所尋將蠻夷戎翟之驕逸不虔于是乎致武此羸者陽也未狎君政故未承命君若惠及之



唯官是徵其敢逆令何足以辱師君之武震無乃玩而頓乎臣聞之曰武不可覲文不可匿覲武無烈匿文不昭陽不承獲甸而祇以覲武臣是以懼不然其敢自愛也且夫陽豈有裔民夫亦皆天子之父兄甥舅也若之何其虐之也晉侯聞之曰君子之言也乃出陽民

斬顛頡第十二

文公問于狐偃曰寡人甘肥周于堂庖酒豆肉集于宮壺酒不清生肉不布殺一牛遍于國中一歲之功盡以衣士卒其足以戰民乎狐子曰不足文公曰吾

弛關市之征而緩刑罰其足以戰民乎狐子曰不足文公曰吾民之有喪資者寡人親使郎中視事有罪者赦之貧窮不足者與之其足以戰民乎狐子曰不足此皆所以慎產也而戰之者殺之也民之從公也爲慎產也公因而迎殺之失所以爲從公矣曰然則何如足以戰民乎狐子曰令無得不戰公曰無得不戰奈何狐子曰信賞必罰其足以戰公曰刑罰之極安至對曰不辟親貴法行所愛文公曰善明日令田于圃陸期以日中爲期後期者行軍法焉于是公有所愛者曰顛頡後期吏請其罪文公隕涕而



晉史卷  
憂吏曰請用事焉遂斬顛頡之脊以徇百姓以明法  
之信也而後百姓皆懼曰君子顛頡之貴重如彼甚  
也而君猶行法焉况于我則何有矣文公見民之可  
戰也于是遂興兵伐原克之伐衛東其畝取五鹿攻  
陽勝虢伐曹南圍鄭反之裨罷朱圍還與荆人戰城  
濮大敗荆人返爲踐土之盟遂城衛雍之義一舉而  
入有功所以然者無他故異物從狐偃之謀假顛頡  
之脊也

### 伐原第十三

文公攻原襄十日糧遂與大夫期十日至原十日而  
原不下擊金而退罷兵而去士有從原出者曰原三  
日卽下矣羣臣左右諫曰夫原之食竭力盡矣君姑  
待之公曰吾與士期十日不去是亾吾信也得原失  
信吾不爲也遂罷兵而去原人聞曰有君如彼其信  
也可無歸乎乃降衛人聞曰有君如彼其信也可無  
從乎亦降溫人聞之亦降孔子聞而記之曰攻原得  
衛者信也

### 舉原令第十四

文公出亾箕鄭挈壺餐而從迷而失道與公相失飢  
而道泣寢餓而不敢食及文公反國舉兵攻原而拔



之文公曰夫輕忍饑餒之患而必全壺餐是將不以原叛乃舉以爲原令大夫渾軒聞而非之曰以不動壺餐之故信其不以原叛也不亦無術乎吾聞明主不恃其不我叛也恃吾不可叛也不恃其不我欺也恃吾不可欺也

### 伐衛第十五

文公出會欲伐衛公子鋤仰天而笑公問何笑曰臣笑鄰之人有送其妻適私家者道見桑婦悅而與言然顧視其妻亦有招之者矣臣竊笑此也公寤其言乃止引師而還至國而貉人攻其地

### 取五鹿第十六

文公問帥于趙衰對曰郤穀可行年五十矣守學彌惇夫先王之法志德義之府夫德義生民之本也能惇篤者不忘百姓也請使郤穀公從之公使趙衰爲卿辭曰欒枝貞慎先軫有謀胥臣多聞皆可以爲輔臣弗若也乃使欒枝將下軍先軫佐之取五鹿先軫之謀也郤穀卒使先軫代之胥臣佐下軍

### 虢亾第十七

文公田于虢遇一老夫而問曰虢之爲虢久矣子處此故矣虢亾其有說乎對曰虢君斷則不能諫則無



與也不能斷又不能用人此號之所以亾文公輟田而歸遇趙衰而告之趙衰曰今其人安在君曰吾不與之來也趙衰曰古之君子聽其言而用其人今之君子聽其言而棄其人哀哉晉國之憂也文公乃召賞之于是晉國樂納善言文公卒以霸

### 分曹地第十八

文公解曹地以分諸侯僖公使臧文仲往宿于重館重館人告之曰晉始霸而欲固諸侯故解有罪之地以分諸侯諸侯莫不望分而欲親晉皆將爭先晉不以故班亦必親先者吾子不可不速行魯之班長而又先諸侯其誰望之若少安恐無及也從之獲地于諸侯爲多反旣受命爲之請曰地之多也重館人之力也臣聞之曰善有章雖賤賞也惡有釁雖貴罰也今一言而闢境其章大矣請賞之乃出而爵之

### 伐鄭第十九

文公過鄭鄭公不禮被瞻諫曰晉公子之從者皆賢者也君不禮焉若復其國而得志于諸侯禍無赦不如殺之鄭君不聽晉國旣定乃興師伐鄭鄭人以名寶行成公弗許曰予我被瞻而師還被瞻曰不若以臣子之鄭君曰孤之過也被瞻曰殺人以免國臣願



之被瞻入晉軍文公將烹之被瞻曰臣願盡辭而從公聽其辭瞻曰尊明勝患知也殺身贖國忠也請就烹乃據鼎而呼曰三軍之士皆聽瞻也自今以來無有忠于其君忠其君故將烹公謝焉乃罷而歸之鄭鄭以之爲將軍

伐宋第二

文公伐宋乃先宣言曰吾聞宋君無道蔑侮長老分財不中教令不信余來爲民誅之

伐鄴第二十一

文公將伐鄴趙衰言所以勝鄴文公用之而勝鄴將賞趙衰趙衰曰君將賞其末乎賞其本乎賞其末則騎乘者存賞其本則臣聞之邾虎公召邾虎曰衰言所以勝鄴今旣勝將賞之曰盍聞之子子當賞邾虎對曰言之易行之難臣言之者也公曰子無辭邾虎不敢固辭乃受賞凡行賞欲其博也博則多助今虎非親言者也而賞猶及之此疎遠者之所以盡能竭智者也

伐楚先兆第二十二

城濮之戰文公謂舅犯曰吾卜戰而龜燂我迎歲彼背歲彗星見彼操其柄我操其標我又夢與荆王搏



彼在上我在下我欲與戰子以爲何如舅犯對曰卜  
戰龜燔是荆人也我迎歲彼背歲彼去我從之也彗  
星見彼操其柄我操其標以掃則彼利以擊則我利  
君夢與荆王搏彼在上君在下則君見天而荆王伏  
其罪也且吾以宋衛爲主齊秦輔我我合天道獨以  
人事固將勝之矣文公從之荆人大敗

### 伐楚第二十三

文公與荆人戰於城濮君問於舅犯舅犯對曰服義  
之君不足於信服戰之君不足於詐詐之而已矣君  
問於雍季雍季對曰焚林而田得獸雖多而明年無  
復也乾澤而漁得魚雖多而明年無復也詐猶可以  
偷利而後無復遂與荆軍戰大敗之及賞先雍季而  
後舅犯侍者曰城濮之戰舅犯之謀也君曰雍季之  
言百世之謀也舅犯之言一時之權也寡人旣行之  
矣

### 結履第二十四

文公與楚戰至黃鴈之陵履係解因自結之左右曰  
不可以使人乎公曰吾聞上君所與居皆其所畏也  
中君之所與居皆其所愛也下君之所與居皆其所  
侮也寡人雖不肖先君之人皆在是以難之也



燒楚軍第二十五

文公與楚人戰大勝之燒其軍火三日不滅文公退而有憂色侍者曰君大勝楚今有憂色何也文公曰吾聞能以戰勝而安者其唯聖人乎若夫詐勝之徒未嘗不危也吾是以憂

用民第二十六

文公卽位二年欲用其民子犯曰民未知義盍納天子以示之義乃納襄王于周公曰可矣乎對曰民未知信盍伐原以示之信乃伐原曰可矣乎對曰民未知禮盍大蒐備師尚禮以示之乃大蒐於被廬作三軍使卻縠將中軍以爲大政卻溱佐之子犯曰可矣遂伐曹衛出穀戍釋宋圍敗楚帥于城濮于是乎遂霸

會盟第二十七

文公合諸侯而盟曰吾聞國之昏不由聲色必由姦利好樂聲色者淫也貪姦者惑也夫淫惑之國不亾必殘自今以來無以美妾疑妻無以聲樂妨政無以姦情害公無以貨利示下其有之者是謂伐其根素流于華葉若此者有患無憂有寇勿弭不如言者盟示之於是君子聞之曰文公其知道乎其不王者猶



無佐也

救饑第二十八

晉國饑公問于箕鄭曰救饑何以對曰信公曰安信對曰信于君心信于名信于令信于事公曰然則若何對曰信于君心則美惡不踰信于名則上下不干信于令則時無廢功信于事則民從事有業于是乎民知君心貧而不懼藏出如入何匱之有公使爲箕及清原之蒐使佐新上軍

宰人上灸第二十九

文公時宰人上灸而髮繞之文公召宰人而譙之曰女欲寡人之哽邪奚爲以髮繞灸宰人頓首再拜請曰臣有死罪三援礪砥刀利猶于將也切肉肉斷而髮不斷臣之罪一也援木而貫鬻而不見髮臣之罪二也奉熾鑪炭火盡赤紅及灸熱而髮不燒臣之罪三也堂下得微有疾臣者乎公曰善乃召其堂下而譙之果然乃誅之

逐獸第三十

文公出田逐獸碭入大澤迷不知所出其中有漁者文公謂曰我若君也道安從出我且厚賜若漁者曰臣願有獻公曰出澤而受之于是遂出澤公令曰子



之所欲以教寡人者何等也願受之漁者曰鴻鵠保  
河海之中厭而欲移徙之小澤則必有九繒之憂鼃  
鼃保深淵厭而出之淺渚則必有羅網釣射之憂今  
君逐獸矚入至此何行之太遠也文公曰善哉謂從  
者記漁者名漁者曰君何以名爲君其尊天事地敬  
社稷周四國慈愛萬民薄賦歛輕租稅者臣亦與焉  
君不敬社稷不周四國外失禮於諸侯內逆民心一  
國流亾漁者雖得厚賜不能保也遂辭不受曰君亟  
歸國臣亦反吾漁所

失麋第三十一

文公逐麋而失之問農夫老古曰吾麋何在老古以  
足指曰如是往公曰寡人問之以足指何也老古振  
衣而起曰一不意人君如此也虎豹之居也厭閒而  
近人故得魚鼃之居也厭深而之淺故得諸侯厭衆  
而亾其國詩云維鵠有巢維鳩居之君放不歸人將  
居之於是文公恐歸遇樂武子樂武子曰獵得獸乎  
而有悅色文公曰寡人逐麋而失之得善言故有悅  
色樂武子曰其人安在乎公曰吾未與來也樂武子  
曰居上位而不恤其下驕也緩令急誅暴也取人之  
言而棄其身盜也文公曰善還載老古與俱歸



西河守第三十二

文公問於舅犯曰誰可使爲西河守者舅犯對曰虞子羔可也公曰非汝之讎也對曰君問可爲守者非問臣之讎也羔見舅犯而謝之曰幸赦臣之過薦之于君得爲西河守舅犯曰薦子者公也怨子者私也吾不以私事害公義子其去矣顧吾射子也

登隧第三十三

文公行地登隧大夫皆扶之隨會不扶文公曰會夫爲人臣而忍其君者其罪奚如對曰其罪重矣文公曰何謂重矣對曰身从妻子爲戮焉隨會曰君奚獨問爲人臣忍其君者而不問爲人君而忍其臣者邪文公曰爲人君而忍其臣者其罪何如隨會對曰爲人君而忍其臣者智士不爲謀辯士不爲言仁士不爲行勇士不爲从文公援綏下車辭諸大夫曰寡人有腰髀之病願諸大夫勿罪也

國難第三十四

文公問于郭偃曰始也吾以國爲易今也難對曰君以爲易其難也將至矣以爲難其易也將至矣

種米第三十五

文公得玄山之粟而美之欲種之宮中問于冀缺對



曰臣嘗服稼穡之事矣凡五穀必以種今君所植者末也種之必不能生公曰寡人不慧不知稼穡微子之言惑其不解乎冀缺曰務農重穀國之本也君之言及此晉國之福也

### 封狐文豹第三十六

文公時翟人有封狐文豹之皮者文公喟然歎曰封狐文豹何罪哉以其皮爲罪也大夫欒枝曰地廣而不平財聚而不散獨非狐豹之罪乎文公曰善哉說之欒枝曰地廣而不平人將平之財聚而不散人將爭之于是列地以分民散財以賑貧

### 問政第三十七

文公問政于舅犯舅犯對曰分熟不如分腥分腥不如分地割以分民而益其爵祿是以上得地而民知富上失地而民知貧古之所謂致師而戰者其此之謂也

### 原季第三十八

文公使原季爲卿辭曰夫三德者偃之出也以德紀民其章大矣不可廢也使狐偃爲卿辭曰毛之知賢于臣其齒又長毛也不在位不敢聞命乃使狐毛將上軍狐偃佐之狐毛卒使趙衰代之辭曰城濮之役



先且居之佐軍也善軍伐有賞善軍有賞能其官有賞且居有三賞不可廢也且居之倫箕鄭胥嬰先都在乃使先且居將上軍公曰趙衰三讓其所讓皆社稷之衛也廢讓是廢德也以趙衰之故蒐于清原作五軍使衰將新上軍箕鄭佐之胥嬰將新下軍先都佐之子犯卒蒲城伯請佐公曰趙衰三讓不失義讓推賢也義廣德也德廣賢至有何患矣請令衰也從子乃使趙衰佐新上軍

李離第三十九

文公使李離爲大理過聽殺人自拘于廷請从于君文公曰官有貴賤罰有輕重下吏有罪非子之罪也李離對曰臣居官爲長不與下吏讓位受爵爲多不與下吏分利今過聽殺人而下吏蒙其从非所聞也不受命文公曰自以爲罪則寡人亦有罪矣李離曰法失則刑失刑失則从君以臣爲能聽微決疑故使臣爲理今過聽殺人之罪罪當从文公曰棄位委官伏法亡國非所望也趣出無憂寡人之心李離對曰政亂國危君之憂也軍敗卒亂將之憂也夫無能以事君闇行以臨官是無功以食祿也臣不能以虛自誣遂伏劍而从



傅謹第四十

文公問於胥臣曰吾欲使陽處父傅謹也而教誨之其能善之乎對曰是在謹也遽條不可使俛戚施不可使仰僬僥不可使舉侏儒不可使援矇瞍不可使視噐瘖不可使言聾聵不可使聽僮昏不可使謀質將善而賢良贊之則濟可矣也若有違質教將不入其何善之爲臣聞昔者太任妊文王不變少濬于豕牢而得文王不加病焉文王在母不憂在傅弗勤處師弗煩事王弗怒敬友二虢而惠慈二蔡刑于太姒比于諸弟詩云刑于寡妻至于兄弟以御于家邦于九乎用四方之賢良及其卽位也詢于八虞而咨于二虢度于闕天而謀於南宮諏于蔡原而訪于辛尹重之以周召畢榮億寧百神而柔和萬民故詩曰惠于宗公神罔時恫是則文王非專教誨之力也文公曰然則教無益乎對曰胡爲文益其質故人生而學非學不入文公曰奈夫八疾何對曰官師之所材也戚施直縛遽條蒙膠侏儒扶盧矇瞍修聲聾聵司火僮昏噐瘖僬僥官師所不材也以實喬土夫教者因體能質而利之者也若川然有原邛浦而後大

益曰季宅第四十一



文公見曰季其廟傳于西牆公曰孰處而西對曰君之老臣也公曰西益而宅對曰臣之忠不如老臣之力其牆壞而不築公曰何不築對曰一日不稼百日不食公出而告之僕僕頓首於軫曰呂刑云一人有慶兆民賴之君之明羣臣之福也乃令於國曰毋淫宮室以妨人宅板築以時勿奪農功

日食第四十二


文公問於士文伯曰三月朔日有食之寡人學懼焉詩所謂彼日而食于何不臧者何也對曰不善政之謂也國無政不用善則自取謫于日月之災故不可不慎也政有三而已一日因民二曰擇人三曰從時公曰善乃舉善政而行之國大治



五  
史  
乘

五  
史  
乘

效  
鈔



國家圖書館, NATIONAL CENTRAL LIBRARY, TAIWAN, R.O.C.